

MANCO MAL

Gh'è du robe che nel tempo
no te pol po' mai cambiar.
Stame atento a sa voi dir,
no te vojo no imbrojar.

No te sé che cosa i è?
Te lo digo mi a la bona:
una l'è la mama e l'altra...
la passion par el Verona.

Manco mal che son dell'HELLAS,
manco mal che son così.

EL BOCIA

Quando bocia te vè a scola
– quela calcio, ben s'intende –
i te insegna tante robe
parchè ti de più te rende.

I te insegna pallegiar,
i fraseggi su le ali,
far el dribbling e a marcar
e anca più i fondamentali.

Po' el bocia torna a casa,
el vorìa essar Pelè,
ma scoltando la tivù
el capisse solo che

par el calciator adesso
– te lo digo con la rima –
quel che l'è de più importante...
l'è de farse 'na velina.

EL WURZ

L'altro giorno ch'era a spasso,
ò trovado Wurz par strada.
L'è quel arbitro famoso
che l'à fato la porcada

del rigore con la Juve
ne la Copa dei Campioni,
quela mano de Serena...
g'avaria cavà i maroni.

E così in confidensa:
“Senti Wurz” alor g'ò dito.
“È passado tanti ani
da quel giorno... maledito.

El passado l'è passà.
Se podemo dar del “tu”?
“Pas problème, bien sur, va ben!”
“Scolta allora... vaffancul!

EL FARINA

Te ricordito Farina?
– niente a lu se ghe perdona –
che 'l fis-ciava sempre contro
a la squadra del Verona?

Te ricordito sto muso
che disastri à combinà,
sempre contro de noialtri
sto fis-ceto malcunà?

L'arbitrava tanto mal
– te lo giuro che l'è vero –
che in pagela i ghe scriveva...
“A Farina... doppio zero!”.

I SETE NANI

Gh'era Bruni, deto "Piso"
che no l'è mia nato ieri.
Quando che la Biancaneve
dopo aver finì i mestieri

straca morta la diseva:
"Vao butarme a farme... un Piso!".
Tuti i nani s'incassava,
tuti quanti a l'improvviso.

Gh'era Brontolo geloso,
gh'era Mamolo petegolo,
anca Dotto el sapienton
e po' Cutolo e po' Pegolo,

Mi me par che i gh'era tuti.
Ah! Coi calseti tuti slisi,
scusa la dimenticansa,
gh'era anca Galderisi.